

## Plenchi

### Bèl a bati

Bèlèm Bèlèm.....TRINGG TRINGGG bèlèm..... TRINGG TRINGGG bèlèm.....subi nos plenchi di skol. Ban biba un momentu agradabel den nos ambiente di skol. Plenchi di Kolegio San Dominico nos ta subi awe. Nan a habri porta pa bo drenta i sera konosí ku nan. E dianan aki kalor ta asotá atrobe. Ta di bolbe kòrda kana ku bòter di awa, òf sinta ku bòter banda di bo. Dal kada ratu dos pa tres slòk di awa pa tene e kurpa hidratá. Bisti paña fresku. Esei no kier men bisti mitar sunú tampoko. Pero bisti katuna fini, evitá flùs diki e kalor. Dal bo wayabera si bo mester bai kualke kompromiso dèftu. Si bo ta largu den solo, dal un pèchi pa protehá bo kabes i kara kontra e solo fuerte. Buska fresku mas tantu posibel. Lo bo tin gana di bebe hopi limonada i djus. Pero no lubidá ku suku a malu pa nos salú. Bebe awa, awa ta limpia, laba i purifiká. Siña apresí e balor di awa i kada bes ku bo dal un slòk yama danki ku bo por limpiá i hidratá bo mes saludabel. Nos ta aserkando dia di dosente ku ta 5 di oktober. Ta un dia pa nos para ketu na tur nos dosentenan ku a kontribuí na nos formashon. Danki na nan kada un pa nan balor agregá. Un felis siman pa boso.

### Riba roster

#### Kolegio San Dominico

Sera konosí ku Kolegio San Dominico. Kolegio San Dominico ta un skol katólíko situá na Montaña Rey 9/11.

Nos ta un skol di fundeshi i ta traha segun e maneho di RKCS.

Nos tin muchanan di entre otro barionan di Montaña, St. Joris, Rooi Santu, Seru Grandi, Seru Machu, Hoenderberg, Montaña bou, Weg Naar Fuik, Hannenberg, Oude Water i Janboos.

Ken ta patron di nos skol?



San Domingo ta patrono di Santo Domingo.

Mayoria biaha e ta potretá ku un buki i un flor. Un krans di kabei riba su kabes limpi pelá. Un strea riba su pechu òf su kabes. Un kachó tur na vlèk ku un fakel den su boka pa sende mundu na kandela. Esaki ta derivá for di e soño kus u mama tabatin ora e tabata sperando Dominicus. El a soña ku el a haña un kacho ku vlèk anto den su boka e tabatin un fakel pa sende kosecha òf mundu na kandela. E nifikashon di e soño aki ta ku e yu ku e lo haña lo proklamá fé ku forsa di kandela unda ku e bai. E lo sende pueblonan na kandela di fé i amor pa Dios i próhimo. Durante di su boutismo, su madrina a mira un strea paresé riba su kabes. Dia 6 òf 8 di ougustus ta dlanan ku ta rekordá San Domingo. E tabata un homber simpel ku tabata sigui Dios ku simpleza. Esnan ku tabata konos'ta bisa di dje: ” Anochi e tabata dediká na Dios i di dia e tabata dediká na hende.“

## **Not' é riba bòrchi**

Pa e aña eskolar nobo aki 2018/2019 Kolegio San Dominico na Montaña tin un kabes di skol nobo, esei ta sra Eveny Maria-Lucasius. Pero ken e señora aki ta, di unda el a bini?

Riba e preguntanan aki el a kontestá asinaki.

"Despues ku mi a kaba Radulphus mi a studia na MAO. Despues di a finalisá e estudio aki mi a traha pa 12 aña den atministrashon. Durante e último añanan ei mi a hasi un reentrenamentu, ku éksito, i mi a drenta enseñansa (ku tabata mi soño di semper!). Mi a traha 15 aña na Kolegio Iris Bruyning na Bonam den grupo 8.

Pa e aña eskolar nobo aki mi a pensa pa ban pa un reto nobo... den nòmber di Dios!

Bon bini na yufrou Eveny Maria.

## **Den agènda**

**5 oktober dia di dosente**

**10 oktober dia di pais Korsou**

**Fakansi di skol**

**8 oktober te ku 12 oktober**

**21 desember te ku 4 yanuari**

## **Riba rapòrt**

Na fin di e aña eskolar ku ta tras di lomba pa mas eksakto den luna di mei 2018 Extura tabatin un kompetensia di korementu pa muchanan di 4 pa 6 aña.

E título (i splikashon) di e kompetensia tabata:

E wil di bida ta sigui drai.

For di wig, baiskel i te na e ko'i kareda ku diariamente ta hiba bo tur kaminda ku bo mester bai. Sea bo tin bo propio ko'i kareda òf ta hasi uso di transporte públiko, konstantemente bo bida ta den moveshon. P'esei ta bon tambe pa para ketu na bo delaster ko'i kareda, paso ora e dia yega, na pia si bo no por bai.

Pa sigui kompartí konosementu i alsa e konsientisashon rib' é importansia ku un seguro di entiero ta pa chikí i grandi,

Extura a organisá un evento deportivo pa muchanan di skolnan di fundeshi di grupo 1 i 2. Esaki en kuadro di e tema 'tráfiko di tera'.

Kolegio San Dominico tambe a partisipá... i a bai ku e premio máksimo.

E alumno ganador di e kompetensia aki su nòmber ta Mervienne Dorothea e tin 6 aña i pa e aña eskolar nobo aki e ta den grupo 3B.

Mervienne (den su Lightning McQueen di Cars) a kore bai laga tur otro mucha den tereno. Tantu mucha muhé komo mucha hòmber. Nos ker a tira un lus riba e alumno aki... MASTER MERVIENNE!

Ta bon pa bisa aserka ku e outo Lightning McQueen di Cars ta obra di su yùfrou di grupo 2, yùfrou Edmée.



## Un prenci

Siman pasá tur direktor ku nan adjunct a bini huntu den un seshon pa diskutí riba puntonan relevante den nan trabou. Nan a interkambiá ku otro koleganan i a tuma tempu pa nan profundisá poko mas den e diferente responsabilidat di nan i nan koleganan di skol.



## **Mi ta konta**

**Lèsnan di wiskunde no ta masha gustá pa un kantidat di hóben. Meskos den klas di mener Pablo, wiskunde tabata un lès no gustá. Mener Pablo a kuminsá e aña ei na e skol. El a mira e muchanan su falta di interes i mester a hasi su bèst pa tende nan lantá òf pa nan komprondé e lèsnan. Pero tur kos a kambia ku e mucha nobo den klas, Roberto. Esei si tabata hoopi malu mes den wiskunde. Nunka bisto. E ta bisa kosnan straño manera un firkant tin 8 huki,  $2+7$  ta 27. Hopi malu mes. Awel muchanan a kuminsá ta hari den klas. Nan tabata gusta bai lès paso nan sa ku Roberto lo bai bisa kosnan tur robes pa drechi. Pero nan sa tambe ku asina e bisa su kosnan straño, mener tabata pidi muchanan pa duna e kontesta korekto pero tambe pa splika Roberto dikon su kontesta ta fout. Anto e tabata duna burt na diferente mucha pa nan trata na splika Roberto na un manera fasil pe e komprondé. Lèsnan a kuminsá bira hopi leuk mes i interesante. Paso kasi no tabatin harimentu mas pero mas tantu tur hende ta purba hasi nan huiswerk bon i komprondé tur kos pa nanpor splika Roberto e kosnan na plaka chiki. Un dia Valerie a disidí di kana tras di Roberto pa wak unda e ta biba, paso kisas e no tin amigu pa konsolé òf yudé na kas. Kanando el a mira ku na mitar di kaminda, mener Pablo a topa ku Roberto. Nan a kana huntu bai meun kas. Nan tabata komentá riba e lèsnan i e splikashonnan di e muchanan den klas. Valarie a komprondé ku Roberto no ta niun dòm, pero ku ta un komedia. EL a disidí di aserká mener i Roberto pa puntra nan kiko ta pasando. Nan a konfesá ku Roberto ta masha bon den wiskunde, pero ku nan a traha un plan pa hasi e lèsnan agradabel, dibertido pero tambe lanta interes pa e hóbennan ke sa tur kos asina bon ku nan por splika un otro. Su manisé mener Pablo a splika e klas e sekreto. For di e dia ei a palabrá ku tur dia un mucha lo hunga pa esun ku no sa e problema i hasi kos pa nan hari, asina tur por trata na resolvé kon ta splika e otronan mihó posibel. E aña ei resultado di e muchanan tabata mas mihó ku nunca. Na un manera kreativo mener Pablo a kishiki e muchanan i lanta nan interes.**

## **Mucha djispou**

**Saida: “Bar tender, kiko ta pasword di boso wifi?”**  
**Bar tender: “sen pa kumpra bo mes internet”**